

Faktor Sokongan dalam Pilihan Raya Di Kawasan DUN Batang Kali, Hulu Selangor, Selangor

Supporting Factors on Elections in the Area of State Legislative Assembly of Batang Kali, Hulu Selangor, Selangor

Noor Amira Sukor
¹Junaidi Awang Besar

Program Geografi
Pusat Kajian Pembangunan, Sosial dan Persekitaran
Fakulti Sains Sosial dan Kemanusiaan
Universiti Kebangsaan Malaysia

Correspondence e-mel: ljab@ukm.edu.my

ABSTRAK

Pengundi mempunyai pelbagai sebab atau alasan untuk menyokong sesuatu parti politik dalam setiap pilihan raya. Terdapat banyak faktor yang mempengaruhi pengundi untuk membuat keputusan penting ketika hari pilihan raya. Justeru, adalah menjadi tujuan penulisan artikel ini untuk menganalisis faktor sokongan dalam pilihan raya di kawasan DUN Batang Kali, Hulu Selangor, Selangor. Kajian ini menggunakan kaedah mengumpul data lapangan yang melibatkan soal selidik, temu bual dan pemerhatian di lapangan. Teknik menganalisis data digunakan dengan menggunakan Statistical Package for Social Science (SPSS) versi 18.0. Hasil kajian mendapati bahawa 48 peratus responden memilih dari segi calon yang berintegriti dalam mempengaruhi keputusan memilih sesebuah parti. Seterusnya, faktor paling utama mempengaruhi responden membuat pilihan untuk mengundi ialah calon dengan 34 peratus. Seterusnya, teori atau model perlakuan mengundi yang paling tinggi ialah manifesto pilihan raya 54 peratus. Kesimpulannya, kajian ini penting kerana dapat menambah ilmu pengetahuan, menambah data berkaitan kajian politik pilihan raya, menambah sumber rujukan kepada semua pihak, menjadi panduan kepada pihak yang berkaitan dan strategik pelaksanaan dasar awam dan gerak kerja dalam pentadbiran.

Kata kunci: *Pilihan raya, faktor sokongan, calon, perlakuan mengundi, politik pilihan raya*

ABSTRACT

Voters have various reasons or reasons to support a political party in every election. There are many factors that influence voters to make important decisions during election day. Therefore, it

is the purpose of writing this article to analyze support factors in elections in the Batang Kali constituency, Hulu Selangor, Selangor. This study uses field data collection methods involving questionnaires, interviews and field observations. Data analysis techniques were used using Statistical Package for Social Science (SPSS) version 18.0. The results of the study found that 48 percent of respondents chose in terms of candidates who have integrity in influencing the decision to choose a party. Next, the most important factor influencing respondents to make the choice to vote was the candidate with 34 percent. Next, the highest theory or model of voting behavior is the 54 percent election manifesto. In conclusion, this study is important because it can increase knowledge, add data related to electoral political studies, add reference sources to all parties, be a guide to relevant parties and strategic implementation of public policy and work in administration.

Keywords: *Election, support factors, candidates, voting conduct, electoral politics*

1. Pengenalan

Politik adalah hubungan antara manusia dalam sesuatu kelompok sosial untuk mendapatkan kuasa serta untuk mengurus/mentadbir sesuatu institusi. Dalam sistem pemerintahan demokrasi, untuk mendapat kuasa politik memerlukan sokongan daripada pengundi mengikut institusi tertentu. Interaksi yang berlaku dalam kumpulan manusia yang berpolitik tersebut terkandung antaranya konflik. Oleh itu politik merupakan hubungan antara individu dengan negara yang dihuninya. Umum mengetahui bahawa Malaysia mengamalkan konsep Demokrasi Berparlimen yang bermaksud rakyat berhak memilih pemimpin dengan cara pengundian iaitu pilihan raya. Sistem Demokrasi Berparlimen di negara ini adalah di bawah Raja Berperlembagaan dengan Seri Paduka Baginda Yang Di-Pertuan Agong sebagai Ketua Negara. Perlembagaan Persekutuan telah digubal dengan mengadakan syarat sedemikian untuk membolehkan pelaksanaan sistem ini. Salah satu kriteria dalam sistem ini adalah pembahagian kuasa kepada tiga bahagian dalam pemerintahan iaitu Perundangan, Kehakiman dan Eksekutif (pentadbiran). Malaysia juga merupakan sebuah negara yang mengamalkan sistem Demokrasi berasaskan kepada sistem Persekutuan. Berdasarkan kepada peruntukan ini, negeri-negeri Perlis, Kedah, Pulau Pinang, Perak, Selangor, Negeri Sembilan, Melaka, Johor, Pahang, Terengganu, Kelantan, Sarawak dan Sabah telah bersetuju dengan konsep penubuhan Negara Malaysia

Malaysia telah memilih dan mengamalkan sistem pemerintahan Demokrasi Berparlimen dan Raja Berperlembagaan sejak mencapai kemerdekaan pada tahun 1957. Demokrasi Berparlimen adalah di mana rakyat melibatkan diri dalam sistem pemerintahan negara manakala Raja-Raja Melayu menjadi lambang taat setia rakyat. Sistem Raja Berperlembagaan, merupakan pemerintahan yang mengekalkan raja sebagai pemerintah tertinggi negara dan negeri yang dibantu oleh Perdana Menteri manakala sistem Republik menolak institusi beraja. Kerajaan ini diketuai oleh presiden yang dipilih oleh rakyat melalui pilihan raya. Kerajaan yang dipilih rakyat melalui pilihan raya untuk kerusi Parlimen dan DUN akan melaksanakan projek pembangunan berdasarkan kuasa dan peruntukan kewangan yang ada untuk kesejahteraan rakyat dan untuk dijadikan alasan bagi dipilih lagi pada pilihan raya akan datang. Justeru, adalah menjadi tujuan kajian ini untuk mengkaji faktor sokongan dalam pilihan raya di kawasan Dewan Undangan Negeri (DUN) Batang Kali, Hulu Selangor, Selangor Darul Ehsan.

2. Tinjauan Literatur

Bagi kajian politik pilihan raya luar negara, menurut Abdul Halim, Zarina & Azizan (2018), Revolusi Iran pada tahun 1979 adalah antara Revolusi dunia telah mengubah domestik dalaman Iran dari sebuah kerajaan monarki kepada Republik Islam, malah turut mencorakkan landskap dan geopolitik Rantau Timur Tengah. Kepimpinan Republik Iran pasca Revolusi Iran (1979-2017) telah mewujudkan ketegangan di antara fahaman Sunni-Syiah di Rantau Timur Tengah dan menyumbang terhadap pergolakan di kalangan negara-negara Arab. Hubungan Iran-Saudi pasca Revolusi Iran 1979 telah menjadi punca Rantau Timur Tengah dalam keadaan tidak stabil. Ia seolah-olah telah menubuhkan blok negara 'Pro-Arab Saudi' dan 'Pro-Iran', 'Perang Dingin' di Rantau Timur Tengah, perlumbaan senjata dan persaingan kekuatan ketenteraan antara Saudi dan Iran serta konflik Sunni-Syiah di Rantau Timur Tengah. Carison & Gimpel (2019) dalam kajian *Political implications of residential mobility and stasis on the partisan balance of locales* menggambarkan corak pergerakan beberapa juta pengundi dalam enam wilayah negara. Penghijrahan ini dilihat lebih tertarik kepada kawasan kejiranan yang lebih bersesuaian dengan politik parti pendaftaran mereka. Mereka yang menukar parti pendaftaran mereka apabila berpindah kelihatan sangat sensitif terhadap perbezaan iklim politik. Hasil kajian mendapati bukti berdasarkan model untuk berjuta-juta bukan penggerak yang berhijrah adalah konsisten dengan pemusnahan politik parti tunggal sama seperti kawasan yang mempunyai ekonomi yang kukuh.

Bagi kajian politik pilihan raya dalam negara, menurut Akmar Hayati & Siti Zobaidah (2014) pada tahun 2008, peratus remaja yang membaca akhbar untuk menelaah isu semasa dan politik adalah sebanyak 54 peratus tetapi menurun kepada 38 peratus pada tahun 2011 dan 32 peratus pada 2013. Berpandukan kepada statistik tersebut jelas menunjukkan bahawa remaja kini semakin kurang membaca. Trend menunjukkan wujudnya jurang penerimaan akhbar yang ketara dalam kalangan golongan remaja. Menurut Fatimah & Ali (2015) menyatakan bahawa pemboleh ubah seperti penggunaan media baru dengan partisipasi politik media baru secara online dan juga partisipasi politik offline saling memiliki hubungan. Media baru disokong sebagai ruang demokrasi maklumat dan belia aktif dalam partisipasi politik secara online dan juga offline.

Bagi kajian politik pilihan raya di negeri Selangor, Junaidi et al. (2015) menjelaskan bahawa jenis kempen, manifesto parti dan calon menjadi medium utama dalam mempengaruhi sokongan responden kepada parti politik dalam PRK DUN Kajang. Keseluruhannya, persepsi terhadap dasar Kerajaan Negeri dan Kerajaan Pusat adalah positif namun pengundi mengharapkan agar isu ekonomi iaitu isu kenaikan harga barangan dan peluang pekerjaan dapat ditangani oleh pihak yang berwajib agar kehidupan mereka lebih baik. PRK DUN Kajang juga memperlihatkan pengekal 'status quo' iaitu kemenangan kepada PKR kerana impak keputusan PRU 2013 masih baru dan terkesan oleh pengundi di DUN Kajang. Junaidi (2017) dalam kajian politik kaum Melayu di kawasan DUN Semenyih, Selangor mendapati bahawa majoriti responden Melayu bersetuju dengan dasar awam yang dilaksanakan oleh Kerajaan Persekutuan dan Kerajaan Selangor. Mereka bersikap positif terhadap sebarang dasar yang bermanfaat untuk rakyat jelata tanpa mengira fahaman politik. Dasar yang mengutamakan keperluan dan kebajikan rakyat akan terus mendapat sokongan rakyat terutamanya dasar yang dekat dihati rakyat. Justeru, pihak berkuasa perlu konsisten dalam melaksanakan polisi sosioekonomi yang baik demi menjaga kebajikan dan kesejahteraan hidup rakyat.

3. Metodologi dan Kawasan Kajian

3.1 *Tata cara pengumpulan data*

Data primer adalah data yang berasal dari sumber asli yang dikumpul untuk menjawab persoalan kajian. Data ini dikumpul oleh pengkaji melalui kajian lapangan seperti soal selidik, temu bual dan pemerhatian di lapangan. Kaedah soal selidik adalah kaedah utama yang digunakan dalam kajian ini bagi mengenal pasti latar belakang responden, seperti umur, jantina dan lain-lain. Dengan menggunakan kaedah soal selidik, 50 orang soal selidik disediakan untuk diisi oleh 50 orang responden. Kawasan yang terlibat untuk melakukan soal selidik dan temu bual ialah di Hulu Yam Baru 1 bagi luar bandar manakala Pekan Batang Kali bagi kawasan bandar dan pembahagian responden mengikut bangsa iaitu 70% Melayu, 20% Cina manakala 10% India.

Kajian ini juga mendapat maklumat dengan menggunakan kaedah temu bual. Item dalam soal selidik yang berkaitan dengan sumber maklumat politik dan isu semasa dan kepuasan terhadap pembangunan fizikal menjadi asas kepada soalan temu bual. Jumlah orang yang ditemu bual adalah seramai 5 orang iaitu terdiri daripada pihak yang terlibat secara aktif dalam politik. Responden yang dipilih adalah yang mempunyai latar belakang politik dari pelbagai jenis parti iaitu UMNO, PAS, PKR dan BERSATU.

Pemerhatian lapangan dilakukan sebelum, semasa dan selepas menjalankan kajian bagi mendapatkan gambaran yang lebih jelas mengenai kawasan kajian. Kaedah pemerhatian turut membantu dalam mengumpul maklumat dan data. Melalui kaedah ini turut memberi gambaran tentang perkara yang berlaku di kawasan DUN Batang Kali untuk memudahkan lagi menjalankan penyelidikan. Kaedah ini digunakan untuk melihat kawasan kajian yang ingin dikaji tentang struktur dan komposisi penduduk di DUN Batang Kali.

Rujukan data statistik digunakan bagi memperoleh jumlah statistik daftar pemilih terkini mengikut kaum di kawasan kajian. Data statistik yang diperolehi daripada Suruhanjaya Pilihan Raya (SPR). Melalui data statistik ini, pengkaji boleh melihat keputusan di setiap kawasan DUN. Oleh itu, pengkaji boleh mengetahui jumlah dan kaum terkini dalam daftar pemilih. Rujukan ini penting kerana ia membantu dalam menganalisis impak terhadap pembangunan setempat terhadap tingkah laku responden di kawasan kajian.

Menurut Marican (2005), data sekunder boleh dirujuk sebagai data yang telah dikumpulkan oleh pengkaji lain. Maklumat atau bahan terbitan yang dikumpul oleh penyelidik lain boleh digunakan sebagai rujukan untuk mencipta formula atau informasi baru bagi menyelesaikan masalah yang timbul pada masa kini mahupun masa depan.

Kaedah kepustakaan merupakan rujukan yang dilakukan dengan menggunakan bahan bacaan tambahan yang diperolehi dari perpustakaan. Dalam menyelesaikan tugas, beberapa bahan rujukan telah digunakan bagi menambahkan lagi maklumat untuk menghasilkan sesebuah kajian yang lengkap. Selain itu, buku rujukan seperti buku ilmiah, jurnal, akhbar, laporan penyelidikan, kertas seminar dan persidangan serta lain-lain turut digunakan bagi mempelbagaikan sumber rujukan.

Kaedah kajian atas talian turut digunakan bagi mencapai maklumat dengan lebih mudah. Antara bahan rujukan yang digunakan ialah dengan melayari laman web internet, akhbar online, sumber WhatsApp, Facebook, Twitter, Instagram dan lain-lain untuk memperbanyakkan lagi maklumat mengenai kawasan DUN Batang Kali.

3.2 *Analisis data*

Analisis data merupakan salah satu proses penelitian yang dilakukan setelah semua data yang diperlukan guna memecahkan permasalahan yang diteliti sudah diperoleh secara lengkap. Data yang dikumpulkan melalui set soal selidik dan ujian bertulis telah diproses dengan menggunakan Statistical Package for Social Science (SPSS) versi 18.0 dan Microsoft Excel untuk menganalisis daripada data yang diperoleh.


3.3 *Kawasan kajian*

Kawasan ini mempunyai ciri-ciri tanah yang sesuai untuk penanaman kelapa sawit dan getah seperti tanah aluvium, lateri dan gambut. Penanaman pokok kelapa sawit lebih dominan daripada getah kerana bentuk muka bumi di kawasan ini lebih sesuai dengan tanaman kelapa sawit. Selain itu, ciri fizikal adalah tanah pamah keseluruhannya dan terdapat juga kawasan yang berbukit. Terdapat juga sebatang sungai di Batang Kali yang dipanggil Sungai Batang Kali. Kawasan Batang Kali pernah mengalami kejadian banjir yang disebabkan oleh sungai tidak dapat menampung isi padu air yang terlalu banyak. Kesannya, hakisan sungai berlaku dan menyebabkan sungai menjadi cetek. Batang Kali mempunyai kawasan penempatan yang lebih daripada 8,000 buah rumah dan mempunyai penduduk seramai 40,000 ke 50,000 orang. Kebanyakan penduduk di Mukim Batang Kali adalah daripada kawasan luar yang melakukan migrasi atas faktor tertentu seperti bekerja, belajar dan sebagainya. Salah satu faktor yang berlakunya migrasi ialah peluang pekerjaan yang terdapat di Mukim Batang Kali.

Selain itu, di kawasan ini terdapat kemudahan pengangkutan seperti jalan raya. Pembinaan jalan raya yang terdapat di Mukim Batang Kali boleh menghubungkan penduduk untuk ke Kuala Lumpur, Genting Highland dan berdekatan dengan lebuhraya. Kawasan pembangunan di Batang Kali mula berkembang dan penduduk semakin meningkat. Ini berdasarkan terdapat pembangunan infrastruktur seperti Econsave, perhentian bas dan deretan bangunan kedai yang dapat memenuhi keperluan penduduk. Penduduk kawasan ini keseluruhannya ialah beragama Islam. Oleh sebab itu, di kawasan kajian Batang Kali terdapat beberapa buah masjid antaranya masjid Kampung Sungai Masin dan masjid Bandar Baru Batang Kali dan lain-lain. Kawasan DUN Batang Kali, Hulu Selangor turut mempunyai masyarakat yang beragama lain dan kawasan ini turut mempunyai pusat beribadah untuk golongan Kristian dan Buddha.

Selain itu, kawasan ini juga mempunyai beberapa buah sekolah rendah dan sekolah menengah antaranya Sekolah Menengah Sains Sains Hulu Selangor. Sekolah ini menjadi tumpuan dan dijadikan tempat pengajian anak penduduk yang menetap di DUN Batang Kali kerana berhampiran dan memudahkan mereka untuk menghantar anak dan mengambilnya bila tamat waktu persekolahan. Bagi peringkat seterusnya, DUN Batang Kali mempunyai sebuah pusat pengajian iaitu Kolej Komuniti Hulu Selangor dimana pelajar lepasan menengah boleh menyambung pengajian dalam bidang kemahiran.

DUN Batang Kali dikenali sebagai N.07 terletak dalam kawasan Parlimen Hulu Selangor bersama-sama dengan DUN Hulu Bernam dan Kuala Kubu Bharu. DUN ini yang merangkumi 11 kawasan Daerah Mengundi iaitu Bukit Rasa, Batang Kali, Hulu Kali, Kampung Padang, Hulu Yam Bharu 1, Hulu Yam Bharu 2, Serendah, Sungai Choh, Sungai Gapi, Sungai Choh Barat, Sungai Buaya dan Bukit Beruntung (Lihat Rajah 1).



RAJAH 1. Peta kawasan DUN Batang Kali

Sumber: Diubahsuai daripada SPR 2018

Pada tahun 1990, DUN Batang Kali telah dimenangi oleh Muhammad bin Muhammad Taib dari Barisan Nasional yang memperoleh 8,575 undi dengan majoriti 5,190 undi. Barisan Nasional dicabar Parti Tindakan Demokratik (DAP) dengan calonnya iaitu Sinniah a/l Periannan yang memperoleh 3,385 undi. Pada tahun tersebut, jumlah peratus pengundian adalah 75.82% dan kertas undian yang dikeluarkan ialah 12,482 dengan jumlah pemilih seramai 16,462 orang. Seterusnya, pada tahun 1995 calon dari Barisan Nasional iaitu Muhammad bin Muhammad Taib menang tanpa bertanding.

Bagi tahun 1999, Dato' Hj Zainal Abidin bin Hj. Sakom dari Barisan Nasional memperoleh 9,048 undi iaitu menang dengan majoriti 4,907 undi. Shariffuddin bin Budin dari Parti Keadilan Nasional telah menjadi pencabar kepada Barisan Nasional dengan 4,141 undi. Walau bagaimanapun, jumlah pemilih ialah 18,718 dan kertas undian yang dikeluarkan adalah 13,648 serta peratus pengundian ialah 72.91%.

Seterusnya, penyandang iaitu Dato' Hj Zainal Abidin bin Hj. Sakom dari Barisan Nasional sekali lagi memenangi di DUN Batang Kali pada tahun 2004. Beliau telah mengalahkan Halili bin Rahmat dari Parti Keadilan Nasional dengan majoriti 8,828 undi. Peratus pengundian ialah 76.82%. Barisan Nasional memperoleh 12,898 undi manakala Parti Keadilan mendapat 4,070 undi.

Bagi tahun 2008, Mohd Isa bin Abu Kasim dari Barisan Nasional memperoleh 11,724 undi iaitu menang dengan majoriti 2,179 undi. Barisan Nasional mempunyai pesaing dari Parti Keadilan Rakyat (PKR) iaitu Mohd. Nashruddin bin Abd Aziz yang memperoleh 9,545 undi.

Jumlah pemilih seramai 27,832, kertas undi yang dikeluarkan sebanyak 21,673 dan peratusan pengundian ialah 77.87%.

Dalam Pilihan Raya Umum ke-13, DUN Batang Kali telah dimenangi oleh Mat Nadzari bin Ahmad Dahlan dari Barisan Nasional yang memperoleh 21,189 undi dengan majoriti 5,398 undi. Barisan Nasional menerima tentangan dari Parti Keadilan Rakyat iaitu Ramachandran a/l Kandasamy yang mendapat 15,791 undi, calon Bebas iaitu Mustapa Kamal bin Sapingi dan Mustaf bin Talib masing-masing mendapat 734 undi dan 476 undi sekali gus hilang wang deposit. Sebanyak 38,824 kertas undi telah dikeluarkan dan peratus pengundi adalah 89.10%.

PRU-14, pada tahun 2018 telah menyaksikan kawasan DUN Batang Kali dimenangi oleh calon Pakatan Harapan (PH) yang menggunakan logo PKR daripada PPBM/BERSATU iaitu, YB Tuan Harumaini Omar. Jumlah undian yang diterima adalah 21,536 undi dengan majoriti 8,315 undi. Pesaing yang turut menyertai PRU-14 ialah Datuk Hj. Mat Nadzari bin Ahmad Dahlan iaitu calon Barisan Nasional yang mendapat 13,221 undi manakala Hj. Md Hasnizan Harun iaitu calon Parti Islam SeMalaysia mendapat 7,408 undi.

4. Dapatan dan Perbincangan


Analisis secara kuantitatif dan kualitatif adalah bagi menghuraikan objektif kajian yang berkaitan dengan Politik Pilihan Raya dan Pembangunan di Kawasan DUN Batang Kali, Hulu Selangor, Selangor. Objektif utama penting kerana pengkaji ingin membincangkan tentang kepuasan terhadap pembangunan dan perkhidmatan pihak berkuasa di kawasan kajian pasca PRU 2018. Akhir sekali, membincangkan impak pembangunan setempat dan tingkah laku politik responden.

4.1 *Perkara Yang Paling Mempengaruhi Keputusan Dalam Memilih Sesebuah Parti Politik*

Berdasarkan kajian, sebanyak 48 peratus responden memilih dari segi calon yang berintegriti dalam mempengaruhi keputusan memilih sesebuah parti (Lihat Rajah 2). Calon yang berintegriti bakal menjanjikan hasil kerja yang lebih baik dan teratur serta amanah. Rakyat menginginkan calon yang boleh menjalankan tugas dengan cekap dan membantu rakyat serta mengembangkan lagi pembangunan di kawasan ini. Sekiranya calon tersebut berintegriti, Dalam aspek tadbir urus dan pentadbiran organisasi misalnya, keruntuhan integriti menyebabkan berlakunya pelbagai kepincangan seperti peningkatan amalan rasuah dan pecah amanah.

Tidak kira sama ada dalam organisasi awam mahupun swasta, pemegang jawatan ataupun pekerja yang tidak memiliki integriti diri yang tinggi akan sentiasa mencari peluang untuk melakukan penyelewengan demi kepentingan peribadi, tanpa memikirkan implikasi perbuatan mereka terhadap imej organisasi dan negara. Seterusnya, perkara yang paling mempengaruhi dalam memilih parti politik ialah manifesto parti iaitu 26 peratus. Manifesto merupakan janji yang dibuat oleh semua ahli politik yang bertanding dalam pilihan raya untuk menarik pengundi. Responden akan mengundi parti yang sekiranya tertarik dengan manifesto yang dibuat oleh ahli politik. Manifesto yang menarik dan banyak memberi manfaat kepada pengundi akan dipilih untuk mentadbir kawasan yang dimenangi. Namun begitu, tidak semua manifesto dapat dicapai selepas kemenangan ahli politik tersebut disebabkan oleh alasan tertentu. Contohnya, mereka yang membuat janji tidak boleh mengambil sikap lepas tangan serta memberi sebarang alasan untuk tidak menunaikan segala janji yang telah dibuat oleh

mereka sendiri. Tindakan untuk tidak memenuhi atau menepati segala janji yang telah dibuat di dalam manifesto juga menunjukkan dengan jelas sikap tidak hormat mereka terhadap para pengundi yang telah memberi kepercayaan dan memberi undi kepada ahli politik dan parti politik yang telah membuat pelbagai jenis janji dalam manifesto pilihan raya mereka.



RAJAH 2. Perkara Yang Paling Mempengaruhi Keputusan Dalam Memilih Sesebuah Parti Politik (peratus)


Sumber: Soal selidik 2020

Akhir sekali, hal yang berkaitan dengan isu semasa mempengaruhi 18 peratus responden dalam memilih parti politik. Responden tidak akan memilih parti politik yang mempunyai banyak isu dan tidak stabil. Keyakinan terhadap parti politik yang kucar kacir, huru-hara dan saling bergaduh antara satu sama lain tidak akan pilih. Selain itu, jika parti politik itu mempunyai pentadbiran yang baik dan sering membantu rakyat dalam segala benda juga akan dipilih. Setiap orang mahukan manfaat dan kebaikan kepada semua dari pemimpin.

4.2 Faktor Paling Utama Mempengaruhi Responden Membuat Pilihan Untuk Mengundi

Antara faktor paling utama mempengaruhi responden membuat pilihan untuk mengundi ialah calon dengan 34 peratus (Lihat Rajah 3). Calon merupakan lambang kepada kepimpinan yang bakal dilaksanakan. Responden akan mengundi sesebuah parti dengan melihat kepada calonnya. Sebagai contoh, responden mengatakan bahawa beliau akan mengundi calon yang mempunyai pendidikan dan pengalaman yang luas dalam bidang politik. Hal ini demikian kerana setiap pemimpin perlu mempunyai ilmu dan pengalaman yang cukup untuk menggalas tanggungjawab sebagai ahli politik dan wakil rakyat. Mereka yang berpengalaman akan mahir dalam membuat sesuatu perkara dan proses kerja akan menjadi lebih cepat. Maka, rakyat dapat menerima pelbagai kebaikan hasil daripada mengundi calon yang mempunyai ilmu dan berpengalaman.

Setiap rakyat mahukan pemimpin yang berjiwa rakyat dan membantu rakyat dari segi pembangunan ekonomi dan sosial.



RAJAH 3. Faktor Paling Utama Mempengaruhi Responden Membuat Pilihan Untuk Mengundi (peratus)

Sumber: Soal selidik 2020


Seterusnya, 30 peratus iaitu faktor dari segi janji manifesto. Manifesto pilihan raya adalah sebuah dokumen bertulis yang mengandungi pelbagai jenis janji yang bakal dipenuhi sekiranya ahli politik atau parti politik yang membuat manifesto terbabit menang dalam proses pilihan raya. Manifesto pilihan raya selalunya dibuat setiap kali adanya tibanya musim pilihan raya. Dengan adanya manifesto pilihan raya ini, rakyat secara keseluruhannya akan mudah untuk memahami segala rancangan yang bakal dilakukan sekiranya ahli atau parti politik yang membuat manifesto ini sekiranya mereka menang pilihan raya kelak. Terdapat pelbagai jenis janji di dalam manifesto pilihan raya ini. Tetapi kesemua janji yang diberi selalunya dilihat sebagai “janji manis” sewaktu pilihan raya yang digunakan untuk memenangi hati rakyat terutamanya hati pengundi. Pengundi selalunya akan memberi undi mereka kepada mana-mana ahli politik atau parti politik yang menawarkan janji yang baik melalui manifesto mereka. Antara janji yang sering dilemparkan adalah yang berkaitan dengan janji untuk mengurangkan kos sara hidup rakyat, janji memperbaiki ekonomi, janji untuk menyediakan banyak peluang pekerjaan, janji untuk memberi pelbagai jenis bantuan sosial, janji untuk meningkatkan tahap serta peluang pendidikan, janji untuk membangunkan pengangkutan awam dan macam-macam jenis janji lagi.

Akhir sekali, 10 peratus terhadap isu. Parti politik yang tidak banyak menimbulkan isu akan dipilih oleh pengundi. Hal ini demikian kerana rakyat tidak mahu parti politik yang sering bergaduh antara satu sama lain, menyebarkan fitnah, menuduh kesalahan sesama lain dan sebagainya. Rakyat hanya mahukan pembangunan yang meningkatkan pendapatan negara. Sebagai contoh, responden tidak akan mengundi parti politik yang sering membangkitkan isu

sensitif seperti isu perkauman, hak sama rata dan lain-lain. Isu perkauman sememangnya menjadi alat kepada parti politik dalam mendapatkan kepentingan mereka walhal rakyat tidak mempunyai sebarang masalah berkaitan perkauman. Perkara seperti ini harus dielakkan jika ingin terus hidup aman dan harmoni kerana Malaysia mempunyai berbilang bangsa dan kaum serta agama.

4.3 *Teori/Model Perlakuan Mengundi Yang Lebih Mempengaruhi Responden Untuk Mengundi*

Berdasarkan hasil kajian, teori atau model perlakuan mengundi yang paling tinggi ialah manifesto pilihan raya 54 peratus (Lihat Rajah 4). Dalam sistem demokrasi, manifesto ialah satu dokumen pemasaran idea, harapan dan masa depan serta alatan untuk parti politik berkomunikasi dengan pengundi. Manifesto lebih dari sekadar janji pilihan raya. Manifesto boleh dianggap sebagai alatan pemasaran atau marketing tool. Dengan alatan tersebut parti politik boleh mempengaruhi persepsi dan minda rakyat. Tentu sahaja manifesto tidak boleh menukar dari persepsi negatif kepada persepsi positif, tetapi sekurang-kurangnya manifesto boleh mengukuhkan jenama positif. Dalam keghairahan parti politik untuk meraih undi, mereka lebih cenderung untuk mengemukakan manifesto yang bersifat populis tanpa melihat kemampuan dan keterbatasan sumber yang ada. Jelas bahawa, pengundi lebih memilih manifesto daripada perkaralain. Seterusnya, Faktor calon yang sama etnik juga bukan merupakan faktor utama pemilihan dalam pengundian, 40 peratus. Pengundi secara umumnya telah mengidentifikasi dengan parti-parti tertentu. Namun begitu didapati juga 6 peratus responden tidak mengikat dengan mana-mana parti dan cenderung kepada model pilihan rasional dan model retrospektif juga semakin membesar dan menjadi faktor penentu di kawasan pilihan raya tertentu.



RAJAH 4. Teori/Model Perlakuan Mengundi Yang Lebih Mempengaruhi Responden Untuk Mengundi (peratus)

Sumber: Soal selidik 2020

4.4 Responden akan Mengundi Parti Politik/Kerajaan Yang Berjaya Merancakkan Pembangunan Sosioekonomi Dan Infrastruktur Di Kawasan Kajian

Hasil kajian mendapati bahawa 88 peratus responden akan mengundi parti politik atau kerajaan yang berjaya merancakkan pembangunan sosioekonomi dan infrastruktur di kawasan ini. Responden memberi pendapat bahawa sekiranya ahli politik dapat melakukan pelbagai jenis pembangunan di kawasan ini, ia akan membantu rakyat dari pelbagai aspek terutama kemudahan jalan raya, peluang pekerjaan, peningkatan pendapatan dan sebagainya. Pihak kerajaan yang membela nasib rakyat akan dipilih oleh masyarakat kerana pemimpin yang bagus harus mengutamakan rakyat bukan hanya semata-mata mementingkan kuasa. Dalam merancakkan aktiviti ekonomi di kawasan ini, rakyat akan memilih parti yang berjaya kerana banyak pengalaman dan pembangunan yang berterusan dapat dilaksanakan. Seterusnya, 12 peratus responden tidak pasti akan mengundi parti politik atau kerajaan yang berjaya merancakkan pembangunan sosioekonomi dan infrastruktur di kawasan. Ini disebabkan oleh mereka kurang yakin bahawa kepimpinan yang akan datang dapat dilakukan secara berterus ataupun tidak. Responden berpendapat bahawa ahli politik hanya inginkan nama dan jawatan sahaja dalam politik tetapi tanggungjawab yang dijalankan tidak seiring dengan yang sepatutnya.

Menurut Datuk Hj. Mat Nadzari Ahmad Dahlan, Ketua UMNO Bahagian Hulu Selangor, beliau menimbulkan persoalan dan jawapan:

“Adakah orang telah mengundi parti yang memajukan kawasan sebelum ini? Tidak sama sekali. Sukar untuk mendapatkan keyakinan pengundi walaupun pemimpin lepas telah membangunkan sosioekonomi dan infrastruktur dengan rancak. Maka, ia tidak akan mempengaruhi saya juga. Perlu dilihat dari pelbagai sudut. Pembangunan yang dibawa kini adalah hanya sekadar pembangunan sedangkan rakyat tempatan masih lagi tidak mendapat manfaat daripada pembangunan tersebut. Sepatutnya, peluang pekerjaan harus diberi keutamaan kepada rakyat tempatan dan barulah boleh dibuka kepada tenaga kerja asing.”

(Datuk Hj. Mat Nadzari Ahmad Dahlan, 16 November 2020)

Menurut Encik Amirul Hafiz Sharif, Ahli aktif Armada BERSATU Bahagian Hulu Selangor, beliau menyatakan bahawa:

“Pengundi sudah tentu akan mengundi parti politik atau kerajaan yang berjaya merancakkan pembangunan sosioekonomi dan infrastruktur di kawasan ini. Rakyat pada masa kini semakin bijak dalam memilih pemimpin. Bagi ahli politik yang berjaya membangunkan kawasan ini akan dipilih sebagai pentadbir, manakala bagi mereka yang dilihat tidak mendatangkan sebarang hasil selama tempoh pentadbirannya, maka rakyat tidak akan mengundi beliau. Setiap orang sangat mementingkan faedah dan kebaikan yang bakal diperoleh sebelum mengundi ahli politik atau kerajaan tersebut. Tiada seorang pun yang inginkan pemimpin yang tidak mendatangkan hasil.”

(Encik Amirul Hafiz Sharif, 18 November 2020)

Menurut Encik Mokhtar Mohd, Ahli aktif PAS Batang Kali, beliau menyatakan bahawa:

“Sudah tentu akan mengundi parti politik yang berjaya merencanakan pembangunan sosioekonomi dan infrastruktur di kawasan ini. Parti politik hanya sekadar kepada parti dan apa yang lebih penting ialah pembangunan yang dilakukan. Bagi mewujudkan sebuah kawasan menjadi bandar, pembangunan sangat penting. Sekiranya kawasan ini ingin maju dan dilengkapi dengan pelbagai jenis kemudahan, maka haruslah mengundi parti yang berjaya merencanakan pembangunan.”

(Mokhtar Mohd, 19 November 2020)

Menurut YB Puan June Leow Hsiad Hui, Ahli Parlimen Hulu Selangor, beliau menyatakan bahawa:

“Adalah tanggungjawab kepada wakil rakyat memajukan kawasan dengan pembangunan infrastruktur. Oleh itu, seharusnya mengundi ahli politik yang berjaya merencanakan pembangunan sosioekonomi dan infrastruktur kerana kemudahan yang banyak akan menarik ramai pelabur luar untuk melabur di kawasan ini. Kesannya, rakyat mempunyai peluang pekerjaan dan sekali gus dapat meningkatkan pendapatan.”

(YB Puan June Leow Hsiad Hui, 20 November 2020)

Menurut YB Tuan Harumaini Hj. Omar, ADUN Batang Kali, beliau menjelaskan bahawa:

“Sudah tentu parti politik yang berjaya merencanakan pembangunan sosioekonomi dan infrastruktur layak diundi. Pengundi tidak akan memilih parti yang tidak memberi manfaat kepadanya. Setiap pengundi inginkan pemerintah yang berdedikasi, bertanggungjawab dan amanah dalam melaksanakan tugas.”

(YB Tuan Harumaini Hj. Omar, 26 November 2020)

5. Rumusan dan Cadangan

Kesimpulannya, hasil kajian mendapati bahawa calon merupakan faktor utama bagi pengundi bagi mengundi dalam pilihan raya di kawasan kajian. Calon yang tepat adalah penting kepada pengundi bagi memberikan perkhidmatan yang terbaik seterusnya dapat menyelesaikan isu dan masalah pengundi setempat. Oleh itu, parti politik perlu memastikan bahawa pemilihan calon pemimpin yang disukai pengundi perlu diberi keutamaan jika ingin menang dalam pilihan raya. Jelas bahawa ahli politik amat memainkan peranan yang penting kepada pembangunan setempat. Kajian ini penting kerana dapat menambah ilmu pengetahuan, menambah data berkaitan kajian politik pilihan raya, menambah sumber rujukan kepada semua pihak, menjadi panduan kepada pihak yang berkaitan dan strategik pelaksanaan dasar awam dan gerak kerja dalam pentadbiran.

Rujukan

- Abdul Halim Daud, Zarina Othman & Nor Azizan Idris. (2018). Hubungan Iran - Arab Saudi dan kestabilan rantau Timur Tengah. *Jebat: Malaysian Journal of History, Politics and Strategic Studies*. 45(1), 147-176.
- Carison, C. & James G. Gimpel, J.G. (2019). Political implications of residential mobility and stasis on the partisan balance of locales. *Political Geography* 71: 103-114.
- Datuk Hj. Mat Nadzari Ahmad Dahlan (Ketua UMNO Bahagian Hulu Selangor). (2020). Politik pilihan raya dan pembangunan di DUN Batang Kali, Hulu Selangor, Selangor. Temu bual, 16 November.
- Encik Amirul Hafiz Sharif (Ahli aktif Armada BERSATU Bahagian Hulu Selangor). (2020). Politik pilihan raya dan pembangunan di DUN Batang Kali, Hulu Selangor, Selangor. Temu bual, 18 November.
- Encik Mokhtar Mohd (Ahli aktif PAS Batang Kali). (2020). Politik pilihan raya dan pembangunan di DUN Batang Kali, Hulu Selangor, Selangor. Temu bual, 19 November.
- Fatimah Akmal & Ali Salman. (2015). Partisipasi politik belia secara 'online' melalui ruang demokrasi maklumat media baru. *Jurnal Komunikasi: Malaysian Journal of Communication*. 31(1), 81-100.
- Firdaus Azil. (2020). COVID-19: Selangor tanggung makanan petugas kesihatan sepanjang PKP. Astro Awani, 1 April 2020 COVID-19: Selangor tanggung makanan petugas kesihatan sepanjang PKP - MB | Astro Awani [20 November 2020].
- Junaidi Awang Besar. (2017). Keberkesanan Pelaksanaan dasar Awam di kawasan Dewan Undangan Negeri (N24) Semenyih, Selangor: Suatu pemerhatian terhadap pandangan pengundi Melayu. *Jurnal Melayu*. 16(2), 131-148
- Junaidi Awang Besar, Mohd Fuad Mat Jali, Novel Lyndon & Sity Daud. (2015). Kempen Pilihan Raya Kecil (PRK) dan persepsi pengundi terhadap dasar kerajaan: kajian kes Dewan Undangan Negeri (N25) Kajang, Selangor. *Geografia Online: Malaysian Journal of Society and Space*. 11(8), 78-89.
- Keputusan Rasmi Pilihan Raya Umum
http://semak.spr.gov.my/spr/laporan/5_KedudukanAkhir.php.
- Keputusan Terkini Parlimen Selangor <http://pru14.spr.gov.my>
- Noraniza Binti Yusoff, Azlizan Talib & Yusuf Pon. (2011). Impak Pembangunan Infrastruktur ke atas Pembangunan Komuniti Penduduk di Daerah Pendang dan Kubang Pasu, Kedah Darul Aman, Malaysia. *Journal of Governance and Development*. 7, 16-36.
- Norzamira Che Noh. (2020). COVID-19: Selangor umum pakej rangsangan ekonomi RM127.78 juta. Berita Harian Online, 20 Mac 2020 COVID-19: Selangor umum pakej rangsangan ekonomi RM127.78 juta (bharian.com.my) [20 November 2020].
- Norashikin Leman. (2016). MB digesa atasi isu kesesakan lalu lintas Selangor. Berita Harian Online, 29 Ogos 2016 MB digesa atasi isu kesesakan lalu lintas Selangor (bharian.com.my) [20 November 2020].
- Nur Farhana Abdul Manan. (2020). Selangor peruntuk RM272.5 juta Pakej Rangsangan Ekonomi 2.0. Sinar Harian, 1 April 2020 Selangor peruntuk RM272.5 juta Pakej Rangsangan Ekonomi 2.0 (sinarharian.com.my) [20 November 2020].
- Portal Rasmi Negeri Selangor <https://www.selangor.gov.my>.
- Portal Rasmi Pejabat Daerah/Tanah Hulu Selangor
<https://www.selangor.gov.my/huluselangor.php>.

- YB Puan June Leow Hsiad Hui (Ahli Parlimen Hulu Selangor). (2020). Politik pilihan raya dan pembangunan di DUN Batang Kali, Hulu Selangor, Selangor. Temu bual, 20 November.
- YB Tuan Harumaini Hj. Omar (ADUN Batang Kali). (2020). Politik pilihan raya dan pembangunan di DUN Batang Kali, Hulu Selangor, Selangor. Temu bual, 26 November.